



# TRACTATUS

OCTAVUS.

## Von Perlen vnd Perlenmutter.

**W**AS Perlen sein/wie vnd worin sie wachsen/auch an welchen örthen sie gefunden/vnnd auß was Landen sie zu vns gebracht werde/wil ich allhie viel meldung davon zu thun (sintemahl andere vortreffliche erfahrene Leute nottürfftig allbereit hievon geschrieben) einstellen/Sie sein (Gott lob) nun mehr bey vns wolbekandt/vnd wissen ihre sorten vnd güte zu vnterscheiden: Sondern / weil Perlein ein gar schön / herrlich vnnd köstlich Gottes geschöpffe seyn/so erachte ich es nötig/ von ihren tugenden/ kräften vnd wirkungen/ so wol wie sie in ihre arcana sollen bereitet/vnd gebracht werden/ zimlichen zu vnterrichten. Darumb wisse/daß die besten Perlen seyn schön weiß/fein vollkommen/rund vnd gewichtig. In die Arzneyen werden die kleinsten gebraucht/die man nicht durch löchern kan / auch wol fragmenta von den grossen/vnd je weisser vnd glänziger / je besser sie sein.

### Eigenschaften vnd Tugenden der Perlen vnd Perlenmutter.

Perlen vnd Perlenmutter dieweil sie beyde einer substanz seyn/kommen in tugenden vnd wirkungen fast vberlein/jedoch die Perlen etwas kräftiger: In ihrer natur findet man sie kalter vnd truckner auch ein wenig zusammenziehender eigenschaft/derhalben wann man sie in Arzneyen inwendig gebrauchet/sie die oberflüssige innerliche feuchte verzehren/ die Geister des Lebens leutern/vñ erfreuen/der trawrigkeit wehren/auch die ermatteten kräfte erquickten vnd stercken: Billig sol man sie zu allen Cordialibus medicamentis